

摘藻堂四庫全書薈要

集部

欽定四庫全書薈要卷一萬四千一百六十八

集部

武夷新集卷十三

宋 楊億 撰

表狀二

二十首

賀劍門破賊表

臣某言今月二十七日得本道進奏院狀報近有西川
駐泊神衛右第三軍第二都虞候王均等為惡作亂奔
衝劍門已據劍門都監裴臻與知州李士衡同共殺敗
者萬毒甚微敢行稱亂鴟張未幾已覩成擒兇醜既殲

朝野相慶臣某中謝竊以王者之謹闕梁所以備他盜
用鈇鉞所以誅叛臣如王均等身率戎行地親藩衛祿
廩優厚賜予便蕃饜飫膏粱被服輕煖出荷干城之寄
曾無汗馬之勞乃敢結構異端脅從羣小苟圖不軌輒
負大恩挺狼貪羊狠之謀為鼠竊狗偷之計天設之險
爰肆憑陵鬼得而誅豈容越軼裴臻等任當要害職在
誰何屬蛇豕之興妖乘貔貅之鼓怒遂摧鋒而奮擊未
旋踵以剪除元惡既就於梟懸餘黨更無於噍類寢皮

食肉式快忠義之心犯門斬關永破姦邪之膽天威所
被井絡載寧賞典聿行輿誦斯愜臣忝分憂寄幸覩捷
音慶抃之誠實萬常品無任云云

謝賜詔書欽恤刑獄表

臣某言今月十日本州進奏院遞到勅書一通賜臣欽
恤刑獄者臣當時集軍州官吏宣示仍下管內諸縣施
行訖天網雖疎尚多於嬰拂夏日可畏用示於哀矜尺
一之詔俯臨圜土之人何幸臣某中謝竊以世質民淳

唐虞以之畫象政平訟息文景幾於措刑蓋由五聽無
冤三章不濫上懷欽恤之旨下萌恥格之心用臻太和
式符至治伏以宗文廣武聖明仁孝皇帝陛下憂勞庶
政涵育羣生化遠被於不毛仁必沾於行葦隱悼伏念
表視民之如傷震曜誅夷示臨下之有赫政經載肅治
具畢張矧於流爍之辰獨軫係累之苦皇華遣使在犴
獄之已清紫素裁書復德音之存降慮及米鹽之細恩
同雨露之濡疾疢者既示醫治貧困者仍加稟給昔周

聚毒藥止療於邦畿漢設淖磨不沾於囹圄足以彰皇
猷之冠古實以固率土之宅心佇去殺以勝殘永無為
而無事臣忝分符竹肅奉絲綸徵慎罰之前言體泣辜
之深旨金科玉律期適於重輕叢棘黃沙敢令於繫滯
誓傾勤瘁仰奉欽明臣無任歡呼激切之至

進承天節頌表

臣某言運偶承平節臨載誕凡叨食於周粟盡願祝於
堯年臣某中謝臣本自諸生偶干寸祿受兩朝之顧盼

無馮唐不遇之嗟閱四部之圖書有黃香未見之恥雖
研精而強力終昧道以迷津然而千載休辰萬邦大慶
充庭任土慙非玉帛之云巢閣舞庭豈在飛走之末是
敢罄竭庸鄙撰承天節頌一首獻於闕下吉甫作頌愧
無清風之稱東方上書或希乙夜之覽臣無任

代人乞太宗御書表

臣某言臣世受國恩名參閏籍竊仰先朝之述作欲期
私室以秘藏輒露愚衷上千聖聽臣某中謝臣伏見太

宗皇帝御製御書等思窮造化妙絕古今與六籍以攸
同非二王之能及固已勒於琬琰揭在蓬萊名山大川
深藏於副本石室金匱首冠於羣書皆所以博綜儒玄
跌宕文史立言不朽乃孔氏春秋之徒懸法授人實唐
堯歷象之比汾水之宸遊雖遠羽陵之墜簡多存如臣
忝荷箕裘幸塵簪紱犬馬之志敢忘於縻捐龜龍之文
徒思於鑽仰輒削章而有請實昧死以無疑伏望尊號
皇帝陛下念先臣際會之由察賤子勤拳之懇特詔金

滕之府許求玉字之書賚及下臣光生寒族威神如在
固共畏於軒臺教化所資誓永藏於魯壁祈恩之至伏
切愚衷

代中書乞罷免表

二首

臣某等言臣等竊以陰陽變治之任實繫台司水旱策
免之文具存載籍苟弼諧之無狀而災沴之或生姑務
偷安靡思避位豈但妨於賢路深有負於國恩臣某等
中謝恭以宰相之位實代天工四海之所具瞻一人之

所注意必在彌綸百度綜覈羣材親附萬民折衝千里
外清戎略使金革之不興上奉天時俾風雨之咸若然
後彝倫攸敘比屋可封富庶而日用不知端拱而天下
自治此輔相之職也自非懷經邦之略負命世之才補
公衮以有餘據台槐而無媿若逢時而肆竊但積日以
宴安豈惟累三光之明固亦致四夷之哂臣等內訟已
久自知甚明苟不露於肺肝亦何覲於面目如臣沆者
本非竒特蓋出遭逢先朝擢自禁林俾參機務曾乏訐

謨之効備彰尸素之慙皇帝陛下以青宮之舊僚委黃扉之庶政深辜物望莫舉官常臣化基僅及中人曾無遠慮先聖偶加於委用明君未忍於棄捐尚待罪以如初實冒榮之滋甚臣敏中早親片善出自諸生固無經濟之能久玷樞機之任周旋兩府終始九年因循徒換於炎涼裨益莫施於塵露內省三臣之蒙鄙曷當萬乘之倚毗徒夙夜以自強終材力之有限履新居上既所置之非宜綆短汲深故雖勤而無効以至和氣不應庶

績未凝林胡犯邊勞翠華而巡狩庸蜀作梗煩羽檄以
徵兵胡雛輒肆於陸梁靈武尚艱於飛輓江吳之俗飢
饉荐臻老幼流離戶口減耗去年近輔淫雨為災今歲
中春甘澤未降物增數倍之價國無九年之儲靜思其
由誠有所自蓋臣等任過其量力不逮心上辜當宁之
知下負蒼生之望決勝寡術不能束五兵於虎皮出令
乖方不能和四時於玉燭延焦勞於宸極負愧恥於心
顏況復日奉天慈動承清問凡於纖悉咸以咨詢曾不

能畫一嘉謀出一奇計慕前哲沃心之說寬大君肝食
之憂匪石之懇空堅挈瓶之智無取尚敢戀萬錢之厚
俸玷三事之近司苟度朝昏自固恩寵進退以禮縱未
忍於置淵鬼神害盈亦終當於瞰室國章雖緩陰譴是
虞況乃多士盈庭異人間出道侔伊呂者非少才比管
樂者實繁伏望陛下別選英髦置於輔弼令臣等退居
散地用洽至公豈惟快華夷僊望之心固亦表君臣終
始之分人惟求舊庶獲於保全鼎既不任免令於傾覆

周章自失隕越靡遑干冒宸嚴期於得請

第二表

臣某等言臣等近者虔述懇誠共陳章奏蓋以燮調之
無狀乞行罷免之明文奉詔旨以丁寧仰天威而隕越
尚怔忡而待罪又僂俛以經旬輿誦益喧沴氣彌積膏
澤未降漸成僇亢之災宸極至尊深軫焦勞之念上無
裨於盻食下有負於具瞻猶尸祿於廟堂亦胡顏於天
地臣等中謝竊以堯咨四岳用致時雍漢免三公以答

天譴蓋以任當輔弼職調陰陽苟愆伏之成災實憂責之攸繫須行邦典以肅朝經如臣等俱是短才謬膺大用在一人注意之地當萬方思治之秋聖德誕敷無山甫將明之効宸襟虛佇之傳說啟沃之言致君之譽言茂聞竊位之譏空積雖勤以補拙亦勞而無功斗筭之智空殫塵露之微何取爝火未息豈禪日月之光山木不材終非梁棟之任是致彝倫尚鬱至化未孚獄訟滋章盜賊多有水旱作沴天災流行江吳荐飢京輔艱食王

春已半甘雨未流終風且霾宿麥將瘁尊號皇帝陛下
夕惕若厲視人如傷分命使臣並走羣望親詣列真之
宇俯施百拜之恭屈萬乘之尊為兆民祈福牲玉靡愛
惟馨之德已聞雲漢彌高離畢之徵未覩豈精誠之不
至實玄感之有由蓋臣等猶執國鈞尚居台席俯慙百
辟仰累三光雖君父之心不棄於遺簪墜屨而皇王之
器何取乎蟠朽株至於三臣之能固亦明主所見駕
駘十駕終無致遠之功寒暑屢遷合舉黜幽之典若但

妨於賢路必自速於靈誅伏望陛下惠以克終矜其不
逮別求賢俊置在鈞衡令臣等退處班行得奉朝請如
此即上玄之意訢合太平之化坐臻豈惟潤礎之祥實
見垂衣之理鹽梅入用固便致於和羹琴瑟更張庶免
成於膠柱顧惟孱末亦冀保全省分甚明祈恩是切云
云

代樞密陳諫議讓表

臣某言伏奉詔命蒙恩特授守右諫議大夫同知樞密

院事餘如故者絲綸之命忽降於九霄宥密之司俾參
於萬務撫微躬而戰慄聽輿議以誼誼實出非常深知
不稱某中謝竊以諫諍之官首冠七人之列樞機之地
日蒙三接之榮運籌帷幄之中議政巖廊之上蓋號股
肱之任必求柱石之材如臣者器本庸微識惟蒙鄙為
學僅通於章句奮身早自於丘園先朝謬中於甲科初
命便塵於史閣佐錢刀於會府投刃靡虛掌漕輓於番
禺揚旌甚遠歸闕荷金章之賜安邊無銅柱之勲尋復

命於紫庭遽叨榮於丹地奉論思於武帳謦諤無聞閱
章奏於公車否臧莫辯顧官箴而是媿矧歲律之未周
敢期渙汗之恩遽授彌綸之寄參決庶務況國政之所
歸叨據上流實人言之可畏顧踐揚之猶淺且位望以
甚隆苟徒竊祿以冒居不敢叫閭而瀝懇既負且乘豈
致寇以非遙居高必危亦疾顛而是懼須披肺腑仰瀆
冕旒伏望尊號皇帝陛下察以至誠寢茲新命職守且
仍於舊貫名器免至於假人所希為官擇才聖朝無虛

授之寵陳力就列下臣遂知止之心干冒宸嚴期於得請

代樞密馮諫議讓表

臣某言伏奉制命授臣右諫議大夫同知樞密院事者任峻樞衡秩崇諫署雖荷自天之命彌增跼地之憂循省再三隕越無措中謝竊以中樞之設庶政攸歸地望處於深嚴職任推於宥密朝夕獻替得預於論思軍國機宜並令於參決苟非挺生民之秀負王佐之才嘉言

嘉猷可陪於漢幄令聞令望素重於周行即何以膺允
澤於九天贊禁廷之萬務在於授受須允僉諧如臣者
擣昧無聞迂疎有素早服膺於文史偶被薦於賢能東
堂謬廁於高科北省尋塵於近列曾乏當官之稱果貽
竊祿之譏俄假一麾遠之五嶺萬里空嗟於日遠莫見
長安六龍幸屬於天飛得還魏闕郎署驟遷於秩序計
司令勾於簿書遽承乏於栢臺得觸邪於莫砌選悞曷
伸於職業因循徒歷於歲時爰自中司便參近侍奉冕

旒於武帳莫効謀猷提銓管於文昌豈分流品敢謂便
蕃之澤俾參密勿之司阜囊秩峻於七人丹地寵延於
三接挈瓶之智頓覺於滿盈履薄之心不勝於戰慄實
羣言之可畏亦省分以甚明須露至誠仰干玄造伏望
尊號皇帝陛下矜其散拙察以勤拳特寢新恩且仍舊
貫即微臣展四體以率職更誓恪居聖朝懸好爵以縻
賢庶無虛授虔切之至伏待允俞

代史館相公讓加門下侍郎表

臣某言伏奉制命蒙恩特授門下侍郎依前同中書門下平章事加食邑實封餘如故者久塵鼎鉉已媿於妨賢忽奉璽書更蒙於進秩聞命之際屏息不遑中謝伏念臣識本顓愚器惟庸瑣徒學素王之道罔究微言偶塵造士之科驟靡好爵自先朝而振拔由近列以徊翔草漢詔於西垣代堯言於內署乃至參萬機之政陪三事之班帷幄坐籌曾無謀於前筭廟堂肉食遂獲謗於素餐退歸封駁之曹出委保釐之務屬承華之肇建俄

賓護以備員羽翼之勤實慙於商皓鹽梅之用復預於
傳巖自再忝於鳳池已五新於棠蔭荐正公台之位顯
司調燮之權曾不能少振國經仰裨帝載一人虛佇殊
無造膝之言四海具瞻深負為霖之望合歸散地用表
至公豈謂特霈殊私曲加異數瑣闥榮遷於秩序樞衡
尚示於倚毗別增食采之封更責濟川之効寵章繁縟
輿議誼譁在於微臣豈不知分儻僂俛而祇受必傾覆
以自貽晉文之寵趙衰雖云求舊漢皇之賜張武適足

愧心須瀝丹衷仰干玄造伏望尊號皇帝陛下俯矜懇
悃曲賜照臨特寢新恩用全大體豈惟聖朝之行爵出
祿絕虛授之譏固亦微臣之責實循名免疾顛之禍干
冒宸扆伏待允俞

代參政王侍郎讓恩命表

臣某言伏奉制命蒙恩特授尚書工部侍郎參知政事
餘如故者文昌六官驟遷於品秩黃樞萬務俾預於訏
謨受寵若驚循涯自失臣中謝竊以輔弼之任實代天

工東求之時允資人傑況巖廊之上副師尹之具瞻車服以庸下丞相之一等豈宜濫處以累至公如臣者才不逮人學非稽古徒荷鯉庭之訓謬登漢殿之科金閨偶列於姓名蓬島獲窺於圖史尋掌綸於右掖復寓直於北門驟蒙振拔之恩獲預樞機之任參謀帷幄曾無前筭之籌受祿水衡深有素飡之媿方憂非據忽奉殊遷佐陰陽調燮之權亞輔相崇高之秩斗筭至小殊覺於滿盈鼎鉉不任轉虞於傾覆苟貪榮寵靡敢敷陳豈

惟鬼瞰以堪憂實亦人言之可畏伏望尊號皇帝陛下
俯矜短拙曲賜保全特詔有司俾停新命既負且乘微
臣免至於疾顛唯器與名聖代更無於虛授虔切之至
伏俟允俞

謝知制誥表

臣某言伏奉制命蒙恩特授臣左司諫知制誥仍面賜
金紫者代言禁掖允謂難才賜服軒墀荐加異數實曳
婁之非稱但跼蹐以靡遑臣中謝竊以青瑣之闥地望

最崇紫微之垣天文是法設著位於赤墀之下開直廬
於黃閣之中草尺一之詔書預五花之判事發為號令
用誕告於萬邦裁成典謨必追蹤於三代自非髦俊豈
副擬掄如臣者生自遐陬本惟寒士始從童丱偶涉藝
文勤雖至於絕編學未能於覩奧先皇帝聞其姓氏召
赴京師試於鈎盾之中署以芸香之職犬馬之齒尚幼
烏鳥之戀頗增獲歸省於庭闈久留連於鄉曲洎還象
闕復隸麟臺尋奏伎於公車得閱書於東觀自爾賜太

常之科第預仙殿之職名獻頌甘泉特頒命服賦詩栢
殿屢挹衢樽屬聖政之惟新荷鴻私而首及擢廁從臣
之列預修太史之書慙無直筆之稱莫述先朝之美俄
切維桑之念堅求剖竹之行崇文廣武聖明仁孝皇帝
陛下推從欲之深仁遂承顏之至懇會稽出守既諧晝
錦之榮天祿言歸重勵草玄之業唯固窮而守道常省
分以忘懷一畝之宮頗棲遲而無悶三千之牘誠銜鬻
以為慙公府絕造請之儀禁掖非覬覦之地老於削槧

是所甘心豈謂皇帝陛下察孤直之無徒念遭逢之有
素當慎選之際垂特達之知拔於羣萃之中需以殊常
之澤補袞之闕驟進七人之班演絲成綸便裁五色之
詔金印紫綬誠佩服以非宜珠網綺錢顧優游而何幸
官歲斯在輿頌是虞至如漢馬卿之才華方令視草唐
常袞之詞學纔善除書豈茲短才可以稱職然萬乘之
知特異九天之命已行譬諸駑駘亦當鞭策其後至於
鉛鈍敢不摩厲以須庶罄竭於誠明免廢墜於職業退

循散拙彌負憂兢仰荷天慈臣無任云云

代參政王諫議陳情表

臣某言臣聞昔者成王疑於姬旦徂東山者三年文侯
信於樂羊示謗書之一篋蓋貝錦萋斐者人臣之共畏
珪璋特達者聖哲之攸難苟非明目達聰表微索隱獨
觀於昭曠之道靡牽於衆多之辭使浸潤之說不行讒
慝之口無狀不然者三月采葛徒積隱憂十人拔楊豈
遑安處徒揣循而自慶實引喻以為煩臣某中謝伏念

臣出自單平本非茂異由丘園而奮跡偶軒陛以策名
叨佐幕於近畿但飲冰而從政尋効官於秘府復結綬
以登朝方司關市之征遽辱已知之薦皇帝陛下誤垂
採聽遠賜徵還俾釐務於錢刀且推恩於章服僊俛從
事唯盡瘁於公家顛沛不違誓服勤於官次曾未周於
歲律俄擢掌於王言已驚馬物議之喧騰曲荷天慈之全
度金紫更光於凡質絲綸莫潤於皇猷纔踰朞月之間
忽辱深嚴之召玉堂待詔極儒者之光華丹筆詳刑體

明君之欽恤振拔之恩尤異傾輸之節彌殫裁五色之書雖發揮之無取訊三尺之法固伏念以惟寅旋使巴庸之邦肅將寬大之詔撫兩川凋瘵之俗宣九重煦嫗之恩導德澤於黔黎察能否於官吏適為注意之任敢辭奔命之勤纔伏奏於青蒲便超陞於黃閣位殊次補官匪序遷昔荀爽十旬誠非驟進虞卿三見徒是傳聞如臣無二子之器能有一時之際會曾未數年之內遽參四輔之班已覺滿盈果招謗議一昨訟端斯起詞語

旁連固亦內省於心反求諸已檢生平之履行念身世
之遭逢未嘗有出位之思安敢造欺天之罪坦無憂懼
顓俟辯明豈期執憲之司反恣舞文之弊捶楚之下鍛
鍊而成構似是之巧詞結沈埋之冤氣上黷凝旒之聰
欲希投杼之疑而陛下深慮矯誣別令訊鞠既從閱實
果致平反使覆盆之幽獲被大明之照肺石之側免為
無告之人苟非陛下燭物無私法天不宰慮五刑之或
濫恐一物之非辜即衆口鑠金復誰分於枉直匹夫懷

璧諒何免於悔尤見聖代之至公顧羣生而何幸臣自
念秉孤直之操荷非常之知徒勵夙夜匪懈之誠固之
左右為容之助絕無黨援素少交親特出宸衷擢參相
府常懷激勵仰戴恩私況處最靈豈有同於土木不能
致遠亦願竭於駑駘其如旅翮甚危寒根易動孑孑孤
立熒熒獨行雖恃明主之恩不顧黨人之議然而禍機
莫測讒舌難防倘媒孽之復生恐別白而無路即陛下
傷知臣之睿鑒微臣昧量力之格言進退之間儻獲於

由禮保全之惠庶遂於克終既無損日月之明亦曲成
螻蟻之志伏望陛下俯矜愚懇稍霽深仁俾罷去於台
司獲退歸於散地青蠅止棘庶免於中傷金鼎和羹幸
無於傾覆曲全大體以庇下臣悽悽之誠實在於此

代中書為靈州陷沒待罪表

臣某等言伏自賊遷作梗西鄙繹騷清遠一城去秋陷
失近者又覩奏報竊知靈州不守將吏淪胥百雉金湯
曾無固護連蔓士庶俱沒腥膻蓋廊廟之乏謀致兇渠

之肆毒動傷嗟於當宁貽媿恥於具臣臣某等中謝竊以鎮撫四夷決勝千里運奇兵於堂上視黠虜於目中使頑獷咸懷疆陲不聳將帥稟指蹤之効君親無忤食之憂此宰輔之任也若冕旒不減於焦勞蜂蠆尚聞於俶擾使蒼生赤子陷于匪人亦尸祿素餐安用彼相實羣言之可畏諒竊位以何顏伏念臣等皆是常材謬當重任雖揣摩鉛鈍策勵疲駑智類挈鎋終莫圖於遠大職司補袞但常懼於闕遺自黨項弗寧靈武孤絕皇帝

陛下臨朝日昃求衣未明憤蛇豕之微妖惜膏腴之舊壤慮朔方之生齒委於餓虎之蹊亟北落以興師殲厥渠魁之首而帷幄曾無於成算塞垣幾至於輿尸去歲救兵逗遛醜類猖熾積石堅壘俄陷賊鋒今春已來又失靈武北門巨屏遂至於丘墟比屋生民俱淪於塗炭蓋臣等每求咨度曾乏謀猷上負倚毗內懷覲厚況安危注意實在台衡夙夜憂邊誠為職業既彌綸之無狀乃咎責之攸歸苟畏避於簡書且因循於官次退思補

過雖慕林父之事君用非其人亦慮匈奴之輕漢須傾
丹款仰黷宸嚴伏望陛下責以官箴俾從吏議特行黜
免用洽至公別選英髦使代其任庶賢能之遞進示憲
法之無私進退攸宜既俯全於國體和平可召固上洽
於天心仰俟刑書臣等無任

謝表

臣等言近以狂寇陸梁朔方覆沒蓋廊廟素無於成算
致士民俱陷於匪人至尊深動於憫傷執政實甘於罪

戾共陳奏牘方俟刑書承詔旨以丁寧仰天威而隕越
臣某等中謝竊以疆場之事爰守在於四夷帷幄之籌
固折衝於千里況處弼諧之任必資經濟之能料敵伐
謀動詢於方略憂邊思職克舉於官常然後塞四海之
具瞻副一人之虛佇如臣等皆惟庸昧莫荷倚毗徒曠
廢於天工豈彌綸於王度自胡雛作梗靈武沾危皇帝
陛下憤蜂蠆之微妖惜金湯之堅壘軫堯心於黃屋遣
漢將於文昌大興號虎之師將平狡兇之穴庶肅清於

氛祲用申畫於封圻而靈旗未出於塞垣巨屏已淪於
寇孽實臣等早無規畫仰負咨詢徵龜玉毀櫝之由抱
舟楫濟川之愧既宴安而非據期策免之是行豈謂陛
下特降泥書曲形天旨尚令備位未責曠官履薄自思
但彌增於怵惕叩閭瀝懇固不敢以再三唯堅盡瘁之
心少贖已然之咎云云

代參政王侍郎謝為陳乞不允表

臣某言臣近者虔拜封章乞歸班列忽奉手詔不賜允

俞仰睿旨之丁寧撫微躬而戰慄欲更披於肝膈慮有
黷於君親中謝伏念臣孤直寡徒頑疎無取章句之學
僅能齒於諸生清白之規固克傳於奕世自策名筮仕
陳力當官塵右掖之清華踐內廷之嚴秘乃至典樞機
之務參輔弼之司並由旒冕之誤知豈副搢紳之公議
小器固難於大受高位唯恐於疾顛夙夜在公雖僂僂
而從事負乘致寇亦跼蹐之靡遑今者訟起下民辭連
執政憲府職當於推鞠獄情遽至於矯誣既閱實以平

反爰舉直而措枉已從明辯式正常刑其如中司長官
是臣外舅踐文昌六卿之貴昧園扉兩造之辭名挂簡
書身繫非所實朝倫之共恥在戚屬以何顏是用瀝懇
紫庭祈恩丹宸願退歸於散地庶允洽於至公豈謂皇
帝陛下推洪覆之深仁示曲成之玄造特頒泥檢俯示
綸言徵周書之舊章以其罪不相及推漢高之大度且
復待之如初仰承雨露之私內積冰淵之懼瀆尊之罪
固不可以再三許國之心但益堅於方寸誓傾臣節上

答天慈云云

代王氏為公主出降進財表

臣貽慶言臣弟貽貞幸以孱微獲叨選尚單平之族驟
集慶於高門柔近之辰冀承榮於築館欲恭陳於厥篚
須仰黷於凝旒臣某中謝竊以詩美王姬聿稱於下嫁
易載帝妹亦重於有歸蓋風化之所由諒古今之共貫
自非閭閻寧得擬掄伏念臣世本文儒家惟寒素寢丘
遺業幾至荒蕪扶陽舊封已嗟廢絕固弓裘之莫續亦

堂構之將隳臣與弟貽貞每勵自強期於克荷誓不衰
於孝謹庶有奉於烝嘗敢謂尊號皇帝陛下察以顯愚
憫其陵替俾聯姻於帝胄永庇族於天光顧孺子之何
知實先臣之不朽預長安之戚里幸會居多開堂邑之
山林榮華斯在今者禮當納幣事等獻芹載循菲薄之
慙益負淩兢之懇黷尊彌甚獲戾是宜云云

代開封溫尚書求解知府表

臣某言臣聞陳力就列先儒有知止之言任重才微前

史著疾顛之戒布在方策皎若丹青固大帶之攸書寶
元龜之斯在臣某中謝伏念臣聲猷素寡材略無聞徒
以遭逢徧塵清近每憂官謗上負聖知一自掌禮秩宗
預文昌之通顯牧民天府總京邑之浩穰唯堅夙夜之
誠仰奉澄清之寄幸而輦轂之下桴鼓稀鳴閭井之間
版圖增羨大姓偶無於侵小庶獄不至於稱冤蓋緣每
奉天顏恭承睿訓俾之彈壓豪右撫字疲羸且形欽恤
之仁深示招攜之旨顧不畏於強禦並特出於主張挺

金石之一心但依洪覆歷星霜之三載莫中巧言苟非
當宁之曲成諒亦傾軔而坐致又伏念負重致遠誠非
泛駕之材錯節盤根終乏投虛之刃米鹽靡密躬親而
豈敢告勞鉤距神明精力而漸知不逮非輒圖於避事
實恐至於敗官伏望尊號皇帝陛下察以虔誠解茲重
任庶保全於賤質免戕賊於勞生中臺職司願講求於
故事未央朝會時瞻望於清光筋骸漸及於衰遲衡泌
或希於頤養仰冀始終之惠少矜懇倒之私

請加尊號第四表

文武百僚南郊大禮使具銜臣呂某等與內外馬步諸
軍將校僧道耆壽等謹詣東上閤門再拜稽首上言曰
臣等一昨體上天之顧諟採萬國之謳謌願增益於鴻
名用昭彰於盛德再三之瀆已負於刺芒億兆之誠彌
堅於仄席遽頒明詔未賜允俞朝野之間啓處無措臣
某等中謝臣等伏以字之曰道蓋出強名何言者天不
聞讓德佛唯大覺美號有百億之殊君乃至尊徽稱兼

三五之盛若夫聖神之冲粹高厚之儀刑非可管窺寧容臆度出於愛戴成此勤拳是故王者懋建大中載稽古訓握河洛之秘紀所以畏天之明順黎獻之歡心所以從人之欲略鳴謙之小節收輿誦之至公雖屈己以無辭誠當仁而不讓者也恭惟尊號皇帝陛下祇荷丕構茂宣重光法人文之化成體神武之不殺惟睿作聖有感必通居上克明無幽不燭泣辜扇暍示仁愛於羣生潔粢豐盛展孝思於九廟躬帝皇之能事掩載籍之

前聞而復探妙道於域中敷至德於天下味希夷之旨
允契混成挺高明之姿雅敦柔克極妙育玄元之理彰
務滋邁種之勤度越古今充格上下故羣情之懇倒述
二美之形容願以大猷著於徽號而陛下固形冲挹猶
鬱耿光莫高匪天徒懷跼蹐無私者日未賜照臨況郊
祀有期方國咸在屹嘉壇而款太一宜昭答於神休奉
灌鬯以見祖宗合紹隆於先志苟違遐邇之請曷副人
祇之心臣等不勝勤勤懇懇敢固上尊號曰崇文廣武

應道章德聖明仁孝皇帝伏望陛下對越景靈祗膺純嘏特詔執事誕舉彝章以仲冬南至之辰天正上元之節畢禋燔於吉土覃渙汗於中區端拱穆清備物典策追九皇而比德與三神以交歡快華夷俟望之心成宗社無疆之慶臣等幸甚天下幸甚謹四奉表陳請以聞

第五表

臣某等言臣等稽合人謀形容帝德願益龍鴻之號仰酬亭育之仁罄華夏之一心奉表章而四上仍降明詔

未賜允俞遐邇之情隕越無措臣某等中謝臣等竊窺
舊史載考前言夫名者實之賓蓋名不可浮於實號者
功之表非號何以明其功天地以不宰為先猶述高明
厚載之大德堯舜以無為而治亦著重華放勳之美稱
恭惟尊號皇帝陛下祇荷慶基誕敷駿德臨下以簡視
民如傷舞干羽以示懷柔卑宮室而訓恭儉作事必咨
於龜筮乃至大同考言爰及於芻蕘克彰好問體玄元
之清淨法夏后之聲身至孝蒸蒸所以奉先而尊祖小

心翼翼所以君國而子民懿鑠溥將淳熙光大是以由
中及外不謀而同咸以為陛下總妙道於無方敷明德
於有截思範圍於休美用訢合於神祇蚩蚩之氓諒亦
知於帝力巍巍之號固上契於天心而陛下載執撫謙
未俞誠請忽邦家之大典忘祖宗之舊章況今祇事紫
壇躬謁清廟四夷助祭知中國之有聖人羣后在庭見
明堂之坐天子羽儀文物之震耀染盛拒鬯之吉蠲三
靈交歡諸神受記盼嚮昭答戩穀具膺豈可徽懿之名

簡略未稱矧復雷雨渙汗肆眚于九垓玉帛駿奔侍祠者萬國咸欲謝生於蒼昊歸美於穆清亦願覩冕旒之當陽觀典策之備物而陛下曲矜小節深抑大猷荷上帝之眷懷乃重違其成命為烝民之司牧反固拒其歡心此臣等所以冒齊斧以上言伏蕭屏而俟報者也是敢不避萬死謹固上尊號曰崇文廣武應道章德聖明仁孝皇帝伏望俯從衆欲式昭德音干犯宸嚴必期得請臣等無任瞻天瀝懇激切屏營之至謹五奉表以聞

代集賢向相公待罪表

臣某言竊以輔弼之司實一人之注意舉措之際乃四海之具瞻苟自輟於悔尤固不遑於啟處臣某中謝伏念臣本非茂異謬竊科名爰遭遇於先朝屢忝塵於華貫西垣掌誥俯及二年南海頒條遠踰萬里偶生還於闕下俄入直於禁中亟膺獎擢之恩俾佐樞機之務但傾駑拙仰奉憂勤累換星霜莫裨塵露崇文廣武聖明仁孝皇帝陛下紹膺丕構褒寵舊臣以先朝簪履之微

不之遺弃顧微臣斗筭之量深覺滿盈遽陪四輔以調
元獲從六龍而展義殊乏一言而啟沃曷寬萬乘之焦
勞尋奉簡書遠巡邊徼恭承宸算遐震天威媿無前筮
之籌尚軫宵衣之慮久塵重位方積厚顏去年陛下特
出非常俾之爰立中外頗喧於輿誦君親益示於眷懷
俯俸循牆靡容固讓負乘致寇果出自貽今者公相之
家子孫構訟事連閨壺詞及錢刀蓋臣遭逢已來賜予
所得輒營別墅有爽素風脫粟拔葵既違於典訓鼠牙

崔角遂起於爭端致上浼於九重實先甘於三黜況臣
位居黃閣俸入甚優日侍紫庭體貌尤異合敦操履以
厲搢紳蔑聞市義之名乃有營私之謗橫議喧騰於鄉
校封章疊委於公車黷冕旒之聰聰罪誠莫贖玷朝廷
之名器責亦何逃俯伏私門以俟公憲然望陛下推豁
達之大度察方寸之微誠念臣久冒寵榮常傾丹赤固
乏代天之業粗堅許國之心特霈鴻私得從輕典即臣
摩頂至踵仰銜覆燾之仁雖死猶生終効糜捐之報臣

無任云云

武夷新集卷十三

欽定四庫全書薈要卷一萬四千一百六十九

集部

武夷新集卷十四

宋 楊億 撰

表狀三 二十首

代駙馬王都尉謝賜宅表

臣某言今月某日中使某至奉宣聖旨賜臣安遠門外永寧坊宅一區者恩寵便蕃心魂戰慄臣某中謝竊以功宣帶礪方聞賜第之榮業紹箕裘乃享高門之慶如臣者家承閥閱性劇顓蒙早違怙恃之慈靡及義方之

訓每進修而自勵期孝謹之不衰俄被天光獲參戚里
顧惟榮忝實越常倫敢謂俯降綸言特頒甲第棟宇式
彰於輪奐堂皇更極於高明渥澤所加方增華於魯館
孱微何幸謬席寵於沁園愈懷冰谷之憂曷報乾坤之
施臣無任感天荷聖激切屏營之至

代僕射李相公待罪表

臣某言臣前日幸參法從獲奉宸游侍龍袞以當陽屬
羽觴之無筭遂成沈醉乃至先歸陪高宴以未終辱具

瞻而斯甚臣某中謝伏念臣齒髮將暮已踰知命之年
血氣既衰夙抱負薪之疾念筋骸之如此固杯杓之不
任矧乃奉屬車之清塵霑玉笋之餘瀝挹千日之味但
覺沈迷瞻八彩之眉自成隕越況任當於衡軸而位冠
於簪纓忽貽倒載之羞深負厚顏之媿省循斯極啟處
靡遑敢不銘座右規覆觴為戒慕顏回之不飲同蘧瑗
之知非庶貳過之或無冀已然之可贖仰祈玄造俯鑒
下誠

代僕射李相公謝降詔慰諭表

臣某言臣數日前獲陪鎬宴遽醉堯樽侍坐不任失儀
斯甚仰陳奏牘方俟刑書忽蒙詔旨以慰安稍息心顏
之覲厚臣某中謝竊以飲不及亂載籍攸稱人而無儀
國風所刺矧居三事之任親陪萬騎之遊瑤池之高宴
方酣湛露之皇恩載洽無溫克之德上奉當陽有載籍
之羞見嗤行路玷名器之如此獲罪戾以是宜尚蒙覆
燾之仁俯矜醉飽之失諒知非於既往永作戒於將來

誓無沈湎之愆以辱崇高之位悚惕之至啟處不遑云
云

代陳州李相公陳情表

臣某言臣聞匈奴未賓去病以之辭第先零尚熾充國
由是請行臣雖至愚常慕前烈輒茲披露甘俟誅夷臣
某中謝竊以無用之臣明君不畜彼其之子載籍攸譏
況臣爵為通侯任居方鎮權兼節鉞位峻台槐厚祿萬
鍾空負素餐之媿元戎十乘莫伸汗馬之勞方今邊候

多虞軍書尚警朝廷未得以高枕帷幄頗聞於運籌而
臣世受國恩身膺閭寄禽息鳥視徒自取於便安烽舉
燧燔曾不思於効用豈人言之可畏實鬼瞰以是憂每
念及茲毛髮俱聳伏望尊號皇帝陛下曲迴玄造洞鑒
丹誠許於戎旅之間乃至重難之處賜之驅策俾効疲
駑焚老上之龍庭誓殲餘孽裹伏波之馬革庶畢乃心
憤發由衷兢惶俟命干冒宸嚴云云

第三表

臣某言臣近者再貢封章備傾忠款忽奉優詔未賜允
俞俯僂無從隕越于下臣某中謝竊以賈生一匹夫耳
乃願係於單于卜式彼何人斯猶誓死於南越況臣職
居連帥位冠列藩大旆高牙任雄節制貂冠蟬冕地峻
公台端居無汗馬之勞竊祿有懸貆之誚矧惟家世際
會國朝爰念先臣逮事太祖契風雲之嘉會被雨露之
殊私乃至延賞後昆冒榮昭代而不能圖勲竹帛濟美
箕裘但恃夤緣仰希覆燾負乘致寇必自取於顛隳懷

安敗名實有孤於養況今斧扆尚煩於旰晷邊陲未
掃於櫓槍帷幄之臣方圖於廟勝介冑之士咸願於身
先如臣忠烈之餘況忝崇高之位苟貪寵祿輒避征行
何以報累朝之恩何以塞輿人之誦伏望尊號皇帝陛
下恕以再三之瀆鑒茲丹赤之誠俾執干戈以守方面
況臣齒髮雖暮亦可強飯於廉頗膽氣未衰豈媿橫行
之樊噲誓約齋于絕漠願喋血以鏖兵執金鼓以長驅
殞鋒鏑而無恨憤悱斯極陳述尤煩干冒宸嚴期於得

請云云

謝降詔不允所請表

臣某言臣近者不自揣循輒傾愚瞽屢陳奏牘上扣天
闔罄犬馬之誠蓋思報主犯雷霆之怒豈敢顧身方懷
惟谷之憂忽降封泥之詔靡加罪戾曲示褒揚撫已無
從戴恩彌厚臣某中謝伏念臣論材甚薄冒寵居多領
近輔之雄藩據中台之顯位賦祿至厚殆踰千戶之封
衛社無功空忝三軍之帥徒宴安於富貴實覲厚於心

顏屬邊戍之未寧固戎臣之思奮係單于之頸孰不有心塞翊侯之旗人皆賈勇爰述乃誠之懇迫兼陳奕世之夤緣以至徵前朝戚屬之家未嘗避一時軍旅之役被堅執銳必誓於身先冒刃推鋒庶求於死所少塞素食之謗免貽青史之羞徒罄勤拳終成孟浪瀆尊不已既罹犯上之愆獲罪攸宜合正投荒之典豈謂尊號皇帝陛下俯矜僭越特示優容未寘金科曲頒芝檢八行睿旨備極於丁寧一介微軀豈勝於隕越仰戴乾坤之

造曷酬雨露之私臣無任云云

求解職領郡表

臣某言臣幸塵近列獲掌命書既無補於休明豈合披
於誠慊蓋內懷於危迫須不避於誅鋤臣某中謝伏念
臣本出寒微且非茂異由先朝而筮仕預祕殿之讎書
叨結綬於士林久濫巾於冊府幸值崇文廣武聖明仁
孝皇帝陛下紹隆丕祚首霈鴻恩擢踐諫垣驟登閭籍
屬刊修於國典亦陪廁於史官既終麟筆之功復遂隼

旗之便洎言歸於京闕方接武於班行遽蒙慎東之私
得齒代言之末地居禁掖日奉內朝官曹所謂於清華
職業唯專於潤色內顧草茅之賤已懷負乘之慙既積
日以彌多愈循涯而自失然念有犯無隱臣誠由是上
通居高聽卑天道於焉下濟臣所以扣帝閣而自述冒
蕭斧以無疑蓋念臣扶侍慈親提挈賤累旅寓輦轂三
十口有餘離去鄉關四千里而遠只請本官之俸給別
無負郭之生涯衣食所資盡出於是乃至庭闈之旨甘

或闕晨夕之饘粥屢空臣母見臣窘急栖遲動靜嗟憫
欲將諸弟南歸故鄉丐索親姻庶圖存活臣親弟化有
妻孥數口寄止潤州一房伶俜都無所託家貧既難於
團聚俸薄不可以分霑窮餓流離誠堪軫念臣又有親
弟倚等見臣資儲乏絕藜藿靡克且欲客遊違離膝下
臣母鍾愛尤甚不忍令漂泊道塗進退傍徨莫知為計
臣未嘗不拊心太息危坐端憂泣涕漣如方寸亂矣蓋
由臣竊代耕之祿莫能為工為商乏適時之才以至不

堪不可侏儒之耕田力作且不及人子雲之篆刻雕蟲
終非曉事萃茲短拙以至窮困然臣學古入官出身事
主含毫弄翰豈甘為腐爛之儒露冕褰帷所願作循良
之吏伏望陛下矜臣危蹙之懇察臣激切之心罷去綸
掖之資假以藩條之任於蘓湖常潤等處令典一州庶
獲養親兼諧聚族魚鹽稍賤聊救於食貧水薤是規終
期於報政幸免翳桑之困永銜魏闕之恩瀝血籲天必
期得請干犯宸嚴臣無任云云

再乞解職表

寫畢有銀臺之命因不敢復上

臣某言臣近寫危誠備形尺奏輒冒萬死仰叩九重瀝懇雖達於雲天俟命已逾於旬浹徒渙蓋高之聽未蒙惻隱之仁臣其中謝竊以國家澄汰品流登進茂異至於典掌誥命步武掖垣乃推擇之所先蓋宦遊之最美禮秩殊厚班著頗崇三殿內朝日趨翔於文陛六飛法從時陪扈於屬車常瞻咫尺之顏專裁寬大之詔此固山東逢掖夙夜禱祠之所求也如臣出於遐陬本無長

技得廁從臣之末獲司王者之言此乃羊服虎皮鷄披
隼翼固陋之質榮幸踰涯又豈敢厭承明之深嚴願辭
侍從之職去長安之全盛求領卑濕之邦蓋桂玉之所
煎恐溝隍之行及涸鱗在輒將懸肆而有期窮猿奔林
諒擇木之何暇既堪憂於四壁亦難事於三緘蓋念臣
職雖詞臣身乃羈客扶老攜幼去里離邦良賤相從三
十餘口衣食所給並出於臣且無負郭之田園固乏滿
堂之金玉凡百經費只仰俸緡至若管庫之微亦有走

卒以執御幸從大夫之後不可徒步而趨朝又須分錢
刀以餽奴市芻粟而飼馬用度非一悉數難周並出於
本官俸錢二十五貫中更無他給供甘之養多闕量入
之費屢殫饘粥餬口之不充進退觸藩之無計原憲誠
知其非病介推豈可以不言竊念臣獲掌命書四更年
籥同列之內或蒙添給俸錢乃至次補皇華將命藩邸
並霑濡潤迭被恩私唯臣貧悴絕倫照臨靡及臣未嘗
不內自循省惕然戰兢蓋由臣蟠木之姿偶廁皇王之

器濫竽之吹謬參韶護之音才不逮於等儕寵難希於
均及然而皇帝陛下已從誤聽置在司言過咎未彰不
欲令其襍被含容至大又豈忍於置淵所以令臣竊位
妨賢貪榮就列漢臣之餓且欲死難免侏儒之嗤孔徒
之病不能興敢懷子路之愠行作若敖之餒鬼徒辱甘
泉之從官實由臣無寸長之可稱有五短而為累不能
闢土殖穀竭力以事親反乃束帶立朝素飡而辱國致
滫瀡之養莫奉於庭闈期功之親將罹於凍餒困窮至

此職臣之由臣母將挈婢媼而歸故鄉庶圖存活臣弟
先有妻孥而寄外郡並絕供須更有親弟倚等皆欲遊
索江淮捨親而去臣之危迫何以自安雖前表之罄情
恐至仁之未察再茲剖露不避縷煩伏望陛下霽曲成
之私矜倒懸之急尚恕觸鱗之罪未加禦魅之刑察以
江湖之間魚米甚賤晨夕之養甘滑可期恢孝治之風
推恩逮下體高明之德以欲從人特於蘇湖常潤等州
假一郡之寄至於宣布皇澤撫養黎氓聖人有言尚東

周之可冀循吏何遠豈西漢之難偕三牲儻獲於承顏
五月誓期於報政然臣素知廉恥無所僥求固於官常
不敢貪冒只希罷免非望改遷以七人補衮之資荷千
里頒條之寄於臣之分所得已多況今多士盈庭君子
在位如臣之比實繁有徒至於潤色鴻猷羽儀瑣闥儻
加慎簡何患乏材若臣者苟蒙錫類之仁得遵量力之
訓烏鳥反哺但期躑躅於一枝鰭鯁並逃豈足盈虛於
九畝披肝瀝血顙俟允俞干犯宸嚴臣無任云云

代鴻臚陳少卿謝男知制誥表

臣某言臣第三男祕書省著作郎直史館堯咨伏奉制命特授右正言知制誥者恩覃貝闕慶集蓬門荷獎擢以非常但兢榮而失據臣某中謝竊以典掌詔令步武掖垣參班綴於赤墀陪豫遊於清蹕自非髦彥豈副選掄臣男堯咨學謝淹通才非茂異趨庭稟訓慙無詩禮之規束帶効官已玷圖書之任豈謂尊號皇帝陛下俯垂簡拔特超羣倫俾升雞省之近司對演龍綸之雅誥

況堯咨冠甲科之選早媿非宜通閨籍已來殊為未久
便掌大君之書命輒與先生而並行俯俸雖訓以益恭
負乘且虞於致寇實光生於舉族但感極於寸心涕泗
不覺以沾濡魂爽更驚於飛越蓋念臣孱微緒息叢集
寵光長男堯叟忝塵宥密之司翊贊樞機之務雖夙夜
之誠益勵而乾坤之造彌深次男堯佐冒寵周行兼榮
史閣出分憂寄式涖藩垣而臣亞秩象河方慚厚祿趨
朝辨色尚玷清班渥澤荐臻鴻私累洽雖藉時來之幸

常憂鬼瞰之災今堯咨又拜命於九重復冒榮於四禁
蚊蚋賤質諒何力以負山葵藿微生但傾心而向日聚
首唯懷於感咽捐軀誓報於高明云云

百官請聽政第三表

臣某等言臣等今者兩陳章奏備瀝懇誠因遺誥之明
文請臨軒而聽政猥奉答詔未賜允俞羣情悚惶不敢
寧處臣某等中謝竊以寰海至廣事有萬機家國異宜
理非一致恭惟皇帝陛下至孝之德上通神明宅憂已

來哀動左右永懷罔極痛深創鉅乃於聽斷未忍躬親
而況長樂上仙顧命斯在奉常掌禮典訓具存蓋以宵
旰務煩君人位重萬方仰戴不可以諒陰百度財成豈
宜於曠廢故前代酌中而立制治命鄭重而為言伏望
稍抑至懷仰遵遺旨念宗社之大計稽載籍之舊章俯
徇輿情臨決庶政所冀百執各揚於乃職羣臣獲覩於
清光慰中外之翹誠副華夷之僊望臣等無任祈天俟
命兢惶激切之至

代寇相公讓恩命第一表

臣某言今月七日內降白麻伏奉制命蒙恩授臣依前
尚書兵部侍郎同中書門下平章事集賢殿大學士加
食邑五百戶食實封二百戶仍賜推忠協謀佐理功臣
餘如故者寵靈自天戰跼無地臣某中謝竊以平章庶
政調變大鈞鎮撫四夷彌綸百度使卿士各任其職陰
陽不失其和此宰輔之任也蓋位峻公台禮絕羣后故
成周論道之際無其人即闕三公之官炎漢責實之秋

乏其才即虛丞相之府況今延鴻啟祚睿哲膺期自非
命世之賢曷處持衡之地伏念臣識慙宏遠學媿淹通
比肩諸生謬中太常之第自結明主誤承先帝之知擢
於等夷置之宥密尋一麾而出守未期歲以來朝復陪
三事之班獲議萬機之政屬先皇求理之日實下臣盡
瘁之時一心匪石以徒堅衆口鑠金而彌甚先朝曲加
覆露終示保全止解職於宰司俾分憂於侯閫適偶重
熙之運益隆乃眷之人盟津境壓於洪河左馮地雄於

秦甸至於岐下亦控隴西莫非作翰之邦並荷長人之
寄暨言旋於魏闕方廁跡於周行忽進秩於秋卿式剴
煩於天邑浩穰為政曾無利刃之可稱僂俛從公常懼
素餐之興謗俄總司於邦計已薦革於歲華徒竭誠明
莫裨旰昃豈謂特頒恩制擢預宰衡況四海具瞻一人
注意謀無前筮曷以承三接之顏智類挈餅豈足增九
鼎之重諒誼譁之可畏固踧踖之靡遑須瀝懇誠乞停
寵渥伏望尊號皇帝陛下俯迴宏鑒式徇至公申飭有

司追寢前詔儻絲綸之命特輟於已行即名器之崇庶
無於虛授情非飾讓言悉由衷仰瀆宸慈期於得請

第二表

臣某言臣近叨恩制擢踐台司尋貢讓章備陳誠欸忽
奉答詔未賜允俞捧讀兢憂罔知所措臣某中謝竊以
弼諧之任中外式瞻授受之間古今攸重蓋所以平章
邦國之政輔相天地之宜作元首之股肱為大川之舟
楫舉不失德乃助懸象之著明用非其人或致處士之

橫議如臣者學非稽古才媿適時徒以際會先朝踐揚
華貫佐萬機之務曾無補衮之勞參四輔之班莫著和
羹之効乃至分憂於藩閫未嘗報政於闕庭神臯剴割
以非長會府經綸而無狀顯官重祿所得已多負乘素
餐貽譏斯甚豈足副蒼生之僉望踐黃閣之崇高用短
綆以汲深泉自知不逮擢散材而構大厦人誰謂宜方
今循名責實之秋為官擇人之際搢紳百執猶或慎於
簡求廊廟三階豈可輕於進用內省尤熟非據是憂伏

望尊號皇帝陛下體玄造之無私鑒丹誠之難奪念名
器之重非可以假人矜斗筭之微不令於踰量追寢前
詔以示至公干犯宸慈期於得請

第三表

臣某言臣近者再陳尺奏願寢渥恩顯俟帝俞庶逃物
議而綸言荐降天聽彌高捧對周章魂神飛越臣某中
謝竊以持衡之地非賢勿居必須契上玄之心庶可委
大鈞之任是以傳說帝賚之弼乃膺爰立之求吉甫嶽

降之神式佐中興之運舉協民望伊尹所以格天用非
時髦匈奴或至輕漢蓋古今之所重垂方策以具存矧
乃睿哲承祧百度思理宰衡當國四海式瞻詢謀所歸
責任尤重況今水旱之後多流離轉徙之民金革未寧
有倔強不臣之虜論兵帷幄首咨決勝之籌議政巖廊
先務富人之術苟非通霸王之大略負匡濟之宏才何
以增三光之明何以慰率土之望如臣者識靡詳於國
體名不動於朝倫但懷孤直之心實昧經綸之業猥升

鼎席式代天工伏櫪之姿諒難致遠挈鉞之量誠合戒
盈雖豁達大度之見容顧萋斐羣言之可畏受爵不讓
恐貽載籍之嗤自知者明敢冒公朝之寵俯僂靡安於
下懇再三須黷於至尊伏望尊號皇帝陛下念台宰之
司禮秩甚峻當宵旰之際毗倚非輕察下臣量力之心
寢外庭已行之命庶具瞻之地無媿於蒼生亦竊位之
譏不玷於青史臣之愚慊罄盡於斯仰叩宸嚴必望俞
允

代中書密院待罪表

臣某等言臣等聞無用之臣明君靡畜不才之木良匠所捐雖天地之心專務於匿瑕含垢而邦國之典所重於黜幽陟明既內省以不遑須上言而自劾臣某等中謝竊以鼎鉉之司是處弼諧之任樞機之地蓋參宥密之謀率土具瞻一人注意庶政並從於關決當陽每示於諮詢自非蘊經邦成務之才負尊主庇民之術運奇兵於堂上外鎮撫於四夷畫成算於幄中遠決勝於千

里致穆清垂裳而無事蒸黎敷手壤以不知乃可備元首
之股肱始免玷公朝之名器如臣等性皆庸昧識本空
疎曾乏寸長義聞片善薦階通顯並出遭逢寵榮益值
於時來崇進非由於德舉乘軒竊位深懷衛鶴之慙食
肉無謀甘被魯人之誚一昨控弦入寇插羽徵師萬旅
戒嚴四鄙入保負扈臨軒而盱食列城摩壘以交鋒燿
火延袤於兩河武帳便蕃於三接而臣等當前席之際
既不能啟沃而矢謇逮羣居之時又不能僉同而建議

徒新取譬言無智者先見之明借筮前籌之愚夫一得之
慮乃至鳴鏑漸侵於甸服翠華將議於時巡擲沐之勞
猶切愛君之志金革之事請嚴責帥之科尊號皇帝陛
下運上聖之沈機排羣言之妄作獨建非常之斷用宣
大定之功親御六師盡護諸將連薨後后家若解於倒
懸案節勞軍人盡同於挾纊果上玄之助順致驕子之
乞盟遂繼好於交兵永輸誠而保塞玉帛通歡於絕域
干戈載戢於中原實九廟之降靈開萬世之美利集茲

巨伐並出宸襟若信諸臣幾誤大事乃至二城陷沒比
戶驚騷多轉死於溝隍或不免於鋒鏑黃屋深在予之
責丹詔形罪已之言構厲階之若斯亦廟謨而安在臣
等誠慙短拙共媿迂疎自知甚明豈敢昧於方寸不能
者止況昭著於格言若冒寵於清朝且偷安於顯位其
如螢爝之耀既無助於三光腹背之毛亦何資於六翮
徒積素餐之謗更貽瞰室之殃伏望陛下推賞罰於至
公示勸懲於來者責以彌縫之無狀暴其輔佐之非才

誕告萬方申儆百執拘於司敗用正常刑然後玄德升
聞可召和平之氣彞倫攸敘更無僥倖之人克臻治定
之期永固延鴻之祚豈但臣等幸甚實亦天下幸甚

答詔

勅某等省所上表待罪事具悉去歲獫狁犯塞河朔
用兵自秋則邊壘戒嚴及冬則胡騎深入羽書日至
烽火相望洎朕乘革輅以親征召兵車而赴會俄通
信使遂結歡盟蓋圖四鄙之平寧以致兆民之安泰

無爽懷柔之道且成息戰之功復念兩河之間屯軍
斯久凋弊滋甚殺傷亦多是以班旋之初時下哀痛
之詔姑務省己以表恤人而卿等左右朕躬周旋機
務獻納皆能於無隱扈從俱謂於有勞況今異域纔
通干戈雖戢吾民初復閭里未完誠宜各罄嘉謀共
恢遠略思撫御於荒徼勤惠養於瘡痍副我任賢之
心成爾致君之業何乃過為引咎同此上章然瀝懇
以甚專在矐懷而方切況記功錄善乃是予哀歸過

責人殊非朕志勤矚之意所宜體之故茲詔示想宜
知悉

代中書密院謝降詔表

臣某等言臣等昨以戎騎侵騷邊城震駭兵鋒日警煩
車駕之省方羽衛天旋紆詔書而罪已蓋帷幄前籌之
無狀固冰淵內省之不遑共拜封章甘俟刑典忽承芝
檢深諭絲言載推善下之仁曲恕已然之咎丁寧備至
啟處無從臣某等中謝伏念臣等皆是瑣才濫塵貴仕

參鼎司之調燮靡副民瞻預機務之彌綸莫熙帝載一

昨控弦犯塞造膝論兵侍宸扆於穆清奉憂勤於旰昃
備堯岳疇咨之列曾乏謨猷廁周臣同德之倫空堅誠
節乃至引弓深入插羽交馳俯逼洪河頗驚近甸樽俎
之畫媿千里之折衝霜露之行勞六龍而展義方式遏
於亂略乃大庇於生民致款塞之乞盟將止戈而不用
此蓋尊號皇帝陛下契上玄之眷命考前代之令猷姑
務遠圖昭示大信排盈庭之衆議克彰獨斷之明許絕

域之通歡式啟太平之業並嚴系睿筭集此殊庸臣等徒
媿備員莫能補職當前席憂邊之際既無決勝之謀及
登壇擇帥之初又闕指蹤之効固乏廟堂之遠略曷逃
鄉校之深譏亦竊位以胡顏輒上言而請罪合議三章
之法以慰諸夏之心而陛下體成湯之至仁尚茲引咎
恢漢高之大度曲示包荒頒紫詔以封泥霈鴻恩於疎
網靡斥歸於散地特矜免於常刑戴玄造以難勝揣丹
衷而失據溟渤之量雖表於納汙駑塞之姿何能於致

遠敢不共加策勵同切傾輸寸有所長庶伸於後効退
思補過恭佩於前言用畢微生少酬洪覆臣等無任云
云

代三司劉密學謝表

臣某言臣一昨以典掌邦計經度軍儲奉鑾輅以省巡
憂職司之廢闕屬王師之振凱幸玄造以包荒雖未正
於典刑亦不遑於官次輒陳封奏願解事權猥辱詔書
靡俞誠請臣某中謝伏念臣早塵官牒莫振時名爰自

先朝謬升通籍嘗出司於漕輓亦共治於方州無心計
以可稱唯詔條之是守幸偶飛龍之慶復參流馬之權
紅粟轉輸曷致九年之蓄青蒲伏奏時親三接之顏尊
號皇帝陛下過聽庸虛特加委任錦帳正名於郎署牙
籌貳秩於省闡歲律未周天慈彌渥特改中樞之近職
旋兼會計之劇司刃非可以投虛力豈任於負重夙夜
匪懈雖不敢以告勞名器假人但深虞於致寇俄屬羽
書狎至黃屋親征當萬乘之時巡有千金之日費急於

星火繁若米鹽雖內罄於丹心終仰繫於洪覆免拘司
敗保全之德已深復涖厥官覲冒之顏斯厚遂瀝由衷
之懇乞從解職之文而陛下靡懲尸祿之愆尚恕叫閤
之僭特頒優詔俯及下臣示絲綸存恤之言慰芒刺兢
憂之抱敢不恭膺聖訓益勵愚誠罄一心以事君更堅
報効展四體以率職用補曠遺庶竭顙蒙少酬萬一臣
無任云云

代中書密院請舉樂第三表

臣某等言臣等近以園寢即安已畢公除之制宗祧升
祔克修吉祭之儀殆茲踰月之間尚闕在懸之奏遂共
徵於典故輒再上於封章猥奉詔書未垂俞允天聽彌
高而是懼輿情若厲以不遑臣某等中謝竊以備樂之
作與天地以同和變禮之文實古今之共守在漢即易
月之後更無過密之儀暨唐乃配廟已還便申宴享之
樂沿襲於茲而為盛典訓繇是以具存伏況丙殿升遐
已終於遠日闕宮合食既祔於神宗公私之間情禮俱

畢而尊號皇帝陛下猶切永懷之痛靡遵順變之規至
於九成治世之音八佾象功之舞皆所以導羣情於和
樂昭盛德之形容既以諧於人神且用調於律呂而乃
寢停雅奏度越禮文雖明詔形未忍之言而歷代有酌
中之制矧今雲門大呂將薦於園丘湛露鈞天合施於
廣宴省方巡狩亦陳詩而觀風臨軒會朝當作樂以侑
食橫汾展豫既伸簫鼓之娛破虜勤歸固有愷歌之盛
國之大事實在於茲伏望陛下採羣臣之瞽言稽前朝

之成式特詔執事申明舊章命協律而考雅音俾廣庭而陳法曲盡善盡美用還正始之風不愆不忘率由方策之訓豈獨臣等幸甚實亦天下幸甚

謝允舉樂表

臣某等言臣等近者累拜封章請陳雅奏伏奉批答特賜允俞臣某等中謝伏以尊號皇帝陛下執契承祧垂裳御宇考質文而稽古體慈儉以化人推翼翼之小心臨下以簡聲蒸蒸之大孝率禮無違爰自長樂登遐紫

宸永慕易月之制早過於禪除復土之儀克終於園寢
先遠之期已畢升祔之禮既行未陳韶護之音頗鬱人
神之望臣等竊尋方策實有典章輒扣高明罔虞進越
誠以鑾輅時巡而展義輿師景從以戒嚴旂常羽衛以
森羅文物聲明而震耀鼓吹之作既有助於軍容旅愷
之儀亦以獻於戎捷式宴用均於慈惠親民況採於聲
詩儻金奏之克諧乃虎賁之增氣蓋公朝之大事有歷
代之成規是用傾肺腑以上言仰雲天而俟命覲九重

之垂聽在三黜以寧辭忽窺明詔之文實慰羣臣之望
豈惟酌中之訓允叶於前經固亦盡善之音式昭於盛
德歡抃之至踊躍彌深云云

謝弟倚特賜進士第二等及第表

臣某言臣親弟進士倚伏蒙聖慈特賜本科第二等及
第者恩出公朝慶深寒族感激之至抃蹈無從臣某中
謝伏念臣爰從幼歲即喪所天無負郭之田園以供糊
口有既孤之弟妹俱未成人世家漸墜於衣纓旦暮將

淪於溝壑臣是以激昂志節博涉藝文割愛遊方出身
事主自神宗之御極忝仙殿之讎書跡遊君子之林月
賦上農之祿爰歸故里親奉安輿盡挈孤遺寓居輦轂
臣弟適當幼稚早失義方春誦夏弦再親加於教導羹
藜含糗固均給於有無殆踰既冠之年輒齒命鄉之薦
春官較藝幸預奏名日昃臨軒躬承明試方懼吹竽之
濫敢希中鵠之榮尊號皇帝陛下簡在宸襟形於清問
俯念司言之近列特推延賞之深仁擢自羣倫寘於科

級仍載頒於睿旨更超踐於等夷側聽德音深感骨髓
傳聞私室喜動庭闈顧同氣之至親荷自天之殊澤榮
過始望事出非常內省微軀上銜厚施非土木之無識
豈不知恩顧龜蛇之甚微猶能報德誓匪躬而自効庶
畢命以為期臣無任云云

請舉樂第二表

臣某等言臣等近者共援典故同拜封章願遵方策之
文式舉咸韶之奏猥蒙答詔未允下誠搢紳之間啟處

無措臣某等中謝竊以禮經制作之意家國異宜載籍沿襲之規古今共守蓋前代立訓允叶於酌中故聖人抑情不忘於俯就簡編所紀軌範攸存恭惟尊號皇帝陛下濬哲在躬欽明撫運孝思光格德教誕敷然而祇率典常疇咨故實是彝是憲不愆不忘伏況丙殿上僊雲陵復土公除已久吉祭屢行新穀既升爰載周於天吏闕宮有恤早昭配於神宗中外之間情禮俱畢而乃享宴之際金石未陳莫循舊章深鬱君望矧惟大樂之

作同和於二儀，飫賜之恩，示慈於百辟。六代並舉，乃盛德之是觀。三年不為，亦雅音之將壞。苟自圖於緘默，靡再黷於高明。廢稽古之大猷，誠有位之深責。伏望陛下俯遵輿誦，啟迪前規。特詔有司，奉行故事。聿舉在懸之樂，誕揚治世之音。崇德象功，光昭於鴻業；來儀率舞，延集於嘉祥。俾人神之克諧，致天地之交泰。豈惟臣等幸甚，實亦天下幸甚。

武吏新集卷十四

謹案卷十二第十三頁前四行復誤賜於選掄原
本誤訛謨據別本改


第十九頁後六行伏以唐制勲官十有二等原
本等訛年據別本改

第二十一頁後四行制民命而斯在原本命訛
會據別本改

第二十二頁前六行紫歌正綿旋襴一領按歌
字疑訛

卷十三第十五頁前六行纔善際書按際字疑訛

第二十四頁前六行弥堅于仄席原本仄訛石據宋文鑑改



總校官庶吉士臣張能照

校對官編修臣閔懋大

謄錄監生臣鄭遇亨